

# Duai il pievel eleger Eveline & Co.?

Il cussegl naziunal ha da s'occupar da l'iniziativa da la pps

■ (anr/abc) L'emna proxima ha il cussegl naziunal da discutir e decider davart ina fatschenta ch'il cussegl dals chantuns aveva refusà ils 24 da settember 2012. I va per l'iniziativa da la Partida populara svizra che vul laschar eleger il pievel il cussegl federal. La chausa è colliada cun emoziuns. Ils parlamentaris grischuns n'han nagina chapientscha per l'iniziativa. Ier suenter mezdi ha la sessiun d'enviern dal parlament federal cumenzà. Per *Hansjörg Walter*, il president dal cussegl naziunal, è ina perioda intensiva cunquai ida a fin. En ses pled da cumià ha el engrazià a ses collegas e confermà ch'i saja stà in onn intensiv. Quel ha cumenzà gist suenter sia elecziun. Ils 14 da december 2011 aveva la pps empruvà da cupitgar *Eveline Widmer-Schlumpf* or da la regenza. Walter era s'unfrì per la pps sco cuntercandidat, e quai per evitar la reelecziun da la cussegliera federala grischuna. Sco quai che l'istorgia mussa n'è il quint dantant betg ì si. La pps aveva stuì registrar ina gronda terrada.

## Effect suenter la terrada da Christoph Blocher

Gist en quest connex ha la pps inoltrà ils 7 da fenadur 2011 ina iniziativa dal pievel. Quella han sutscrit 108 826 persunas cun il dretg da vuschar. Ella è valaivla e cunquai han las chombras federalas da s'occupar da la chausa avant ch'il pievel po prender posiziun definitiv. Ina elecziun dal pievel saja pli democratica e correspundia dapli a la Svizra, ha il comitè



Tenor l'iniziativa da la pps svizra duai il pievel eleger sia regenza. L'onn proxim vegn il pievel ad avair il davos pled en quest chapitel.

KEYSTONE

d'iniziativa accentuà. Il sistem actual da l'elecziun dal cussegl federal saja tut auter che transparent, han ils iniziants argumentà. L'iniziativa battia era cunter ils gieus che vegnian fatsg dadora las salas dal parlament. En memoria han ins gi la terrada cun *Christoph Blocher*. *Eveline Widmer-Schlumpf* è vairamain stada la culpa che la pps ha lantschà l'iniziativa. Il comitè n'ha betg concedì quai, suletmain ac-

centuà ch'il sistem cun l'elecziun tras il pievel correspundia al sistem pratigà en ils chantuns. I saja ina schanza per rinforzar ils dretgs democratics.

I constat ch'il pievel elegia sia regenza en ils chantuns. E quai duai valair era sin plaun federal. *Hansjörg Walter* che ha surdà ier a *Maya Graf* (BL) il presidi dal cussegl naziunal tutga era tar il comitè d'iniziativa, vinavant *Toni Brunner* (SG),

*Jean-François Rime* (FR) e 25 autras personalitads da la pps. Avant dus mais, ils 24 da settember, ha il cussegl dals chantuns tratg ina decisiun clera. Cun 35 cunter 6 vuschs ha la chombra pitschna refusà l'iniziativa. L'emna proxima è l'iniziativa tractandada en il cussegl naziunal. Il cusseglier naziunal grischun da la pps, *Heinz Brand*, vegn a stuvair sa dustar per l'iniziativa. En in discurs cun l'anr lascha el

alura era valair cleramain: «Jau crai che l'iniziativa n'haja era nagin success en il cussegl naziunal, l'opposiziun è memia gronda. Tuttina èsi da dir: La finala decida il pievel, e quel po decider auter che la politica.» El sa referischa sin la fatschenta cun la lescha davart la taxa turistica («LTT») ch'il pievel grischun ha refusà dumengia, passada, quai malgrà che tuttas partidas, regenza, cussegl grond, gruppas d'interess, divers sindicats e vischnancas avevan proponi d'approbar quella. «Il pievel vesa magari auter che la classe politique», manegia *Heinz Brand* e concluda ch'i saja ina tractanda impurtanta per la politica statala.

## Cunter l'americanisaziun da las elecziuns

In auter parlamentari che l'anr ha inscuntrà ier a Berna è *Martin Candinas*. L'emna proxima ha el ina clera opiniun tar l'iniziativa «elecziun dal cussegl federal tras il pievel». Il pievel vegn franc e segir a dir na a quell'iniziativa. Pertgei els vesan sez tgei consequenzas che quei havess», di el. El pareglia las elecziuns dal president American. Sch'il pievel elegess il cussegl federal, muntass quai l'americanisaziun dal sistem d'elecziun da la Svizra. Il pievel en ils chantuns elegia ses represchentsants a Berna e confidia a quels la cumpetenza d'eleger la regenza svizra. En questa regenza haja la collegialitad ina immensa impurtanza. Enfin oz sajan nus ids bain cun quest sistem e la pluralitad dal pievel sappia apprezzar quai.